

Իմ թանկ ոտքը

հեղինակ՝ Հայրիկ Բյու
թարգմանիչ՝ անհայտ
աղբյուր՝ Մարինե Մելիքյանի կայքը

Հիմա նրանք ինձ հնարավորություն են տվել: Նրանք ինձ հաշվառման են վերցրել: Ես պիտի ներկայանայի աշխատանքային գրասենյակ և ես ներկայացա գրասենյակ: Պաշտոնավայրում նրանք շատ սիրալիր էին: Վերցրեցին իմ հաշվառման քարտը և ասացին. «Հըմ»: Ես էլ ասացի «հըմ»:

— Ո՞ր ոտքն է,— հարցրեց պաշտոնյան:

— Աջ:

— Ամբողջությամբ:

— Ամբողջությամբ:

— Հըմ,— նորից արեց նա: Հետո սկսեց քրքրել տարբեր թղթեր: Ես կարող էի նստել:

Վերջապես մարդը գտավ մի թերթիկ, որն, ըստ երևույթին, ճիշտ իր ուզածն էր: Ասաց.

— Կարծում եմ, Ձեզ համար ինչ-որ բան կճարվի: Մի լավ գործ: Դուք հնարավորություն կունենաք նստած տեղը աշխատել: Կոշիկ մաքրող, հանրապետության հրապարակի հասարակական գուգարաններից մեկում: Ինչպե՞ս է:

— Ես չեմ կարող կոշիկ մաքրել, ես արդեն վատ մաքրողի համբավ ունեմ:

— Դուք կարող եք սովորել,— ասաց նա:— Մարդը կարող է ամեն ինչ սովորել: Գերմանացին ամեն ինչ կարող է: Ցանկության դեպքում դուք կարող եք անվճար դասընթացների մասնակցել:

— Հըմ,— արեցի ես:

— Բարի՞, ուրեմն:

— Ոչ,— ասացի,— ես չեմ ուզում: Ես ավելի բարձր ռոճիկ եմ ուզում:

— Դուք խելքներդ թոցրել եք,— մեղմ ու բարեկամաբար հանդիմանեց նա:

— Ես խելքս չեմ թոցրել, ոչ մեկը չի կարող ետ բերել իմ ոտքը, ես այլևս չեմ կարող սիգարետ վաճառել, հիմա արդեն դա ինձ համար դժվար է:

Մարդը ետ ընկավ աթոռին և խոր հոգոց հանեց:

— Միտելիդ իմ,— սկսեց նա,— ձեր ոտքը խելքից դուրս թանկ ոտք է: Տեսնում եմ՝ քսանինը տարեկան եք, առողջ սիրտ ունեք, առհասարակ կատարյալ առողջ եք, ոտքից գլուխ: Կապրեք յոթանասուն տարի: Խնդրեմ, հաշվեք, ամսական յոթանասուն մարկ, տարվա մեջ՝ տասներկու անգամ, ուրեմն՝ քառասունմեկ անգամ տասներկու անգամ յոթանասուն: Հաշվեք խնդրեմ, տոկոսները հանած: Մի կարծեք, թե ձեր ոտքը միակն է:

Դուք ինքներդ նույնպես միակը չեք, ով հավանաբար դեռ երկար կապրի: Եվ այդ ամենով հանդերձ՝ ռոճիկը բարձրացնել: Ներող կլինեք, բայց դուք խելքներդ թոցրել եք:

— Պարոնս,— ասացի ես, իր նման ետ ընկա աթոռին և խոր հոգոց հանեցի,— կարծում եմ, որ դուք իմ ոտքը խիստ թերագնահատում եք: Իմ ոտքը շատ ավելի թանկ է: Շատ— շատ թանկ ոտք է: Ոչ միայն իմ սիրտն է կատարյալ առողջ, այլև, դժբախտաբար, գլուխս: Մի բոպե լսեք:

— Ժամանակ չունեմ:

— Լսեք մի բոպե,— ասացի ես,— նույն ինքը՝ իմ ոտքը շատ— շատերի կյանք է փրկել, այդ մարդիկ այսօր լավ ռոճիկ են ստանում: Ահա թե բանն ինչպես եղավ: Բոլորովին մենակ պառկել էի առջևի գծում մի տեղ և հսկում էի, թե երբ նրանք կգային, որպեսզի մերոնք ճիշտ ժամանակին կարողանային հեռանալ: Հետին գծում շտաբները կազմ— պատրաստ սպասում էին. նրանք չէին ուզում ոչ շուտ, ոչ էլ ուշ հեռանալ:

Սկզբում երկու հոգով էինք, բայց նրան սպանեցին, նա էլ ոչինչ չարժեր: Ճիշտ է, ամուսնացած էր, բայց կինը ողջ է և ի վիճակի է աշխատելու. այնպես որ դուք վախենալու կարիք չունեք, նա ուրեմն սարսափելի էժան էր: Ընդամենը չորս շաբաթվա զինվոր էր և մի փոստային բացիկից ու զինվորի մի կտոր հացից ավելին չարժեր: Այնքան ազնիվ ու քաջ էր, որ առնվազն իրեն սպանել տվեց: Լավ, ուրեմն, մենակ պառկել էի այնտեղ և վախենում էի, և ցուրտ էր, ես էլ էի ուզում հեռանալ, այո, և այն է՝ ուզում էի հեռանալ, երբ մեկ էլ...

— Ես ժամանակ չունեմ,— ասաց մարդը և սկսեց փնտրել մատիտը:

— Ոչ, լսեք մինչև վերջ,— ասացի,— ամենահետաքրքիրը հիմա է: Հենց որ ուզում էի հեռանալ՝ ոտքիս այս պատմությունը եկավ գլխիս: Եվ որովհետև, ինչ խոսք, այդպես ընկած պիտի մնայի, մտածեցի ինքս ինձ՝ հիմա դու կարող ես արդեն ազդանշան տալ, և ես ազդանշան տվեցի, և նրանք բոլորը արանքը ճղեցին, հերթով, ըստ կարգի, նախ գորամասը, հետո գունդը, հետո գումարտակը և մնացածները՝ իրար ետևից, շարեշար: Տիմար պատմություն. նրանք մոռացան ինձ հետները վերցնել, պատկերացնում էք: Այնպես էին շտապում: Իսկապես որ տիմար պատմություն. թե որ ոտքս չկորցնեի, բոլորն էլ կմեռնեին՝ գեներալը, գնդապետը, մայորը՝ հերթով, ըստ կարգի, և դուք հիմա ստիպված չէիք լինի նրանց ռոճիկ տալ: Դե հիմա ինքներդ հաշվեք, թե ինչ արժե իմ ոտքը: Գեներալը հիսուներկու տարեկան է, գնդապետը՝ քառասունութ, մայորը՝ հիսուն, բոլորն էլ ոտքից գլուխ առողջ, առողջ սիրտ, առողջ գլուխ, իրենց զինվորական կենցաղն էլ վրադիր՝ կապրեն առնվազն ութսուն տարի, Հինդենբուրգի չափ: Դե, խնդրեմ, հաշվեք. հարյուր յոթանասուն անգամ տասներկու անգամ երեսուն, միջինը վերցնենք թեկուզ երեսուն, այո? Իմ ոտքը դարձել է խելքից դուրս թանկ, մեկը ամենաթանկ ոտքերից, որ ես կարող եմ երբևէ երևակայել, հասկանում եք:

— Չէ, դուք խելքներդ թոցրել եք,— ասաց մարդը:

— Ոչ,— պատասխանեցի,— ես խելքս չեմ թոցրել: Ափսոս, որ սիրտս գլխիս պես առողջ է, ափսոս, որ ոտքս կորցնելուց գոնե մեկ բոպե առաջ ինքս էլ չսպանվեցի: Մենք շատ փող խնայած կլինեինք:

— Հիմա ինչ, ուզում եք այս տեղը,— հարցրեց մարդը:

— Ոչ,— ասացի ես և դուրս եկա: